



TEKS

KHUTBAH

NEGERI PAHANG

SIRI 04/2024



ZAKAT MEMBAWA BERKAT 05 APRIL 2024 | 25 RAMADAN 1445H

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ. وَنَعُوذُ بِاللَّهِ مِنْ شُرُورِ أَنْفُسِنَا وَمِنْ سَيِّئَاتِ

أَعْمَالِنَا. مَنْ يَهْدِهِ اللَّهُ فَلَا مُضِلَّ لَهُ وَمَنْ يَضِلَّ فَلَا هَادِيَ لَهُ.

وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ.

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.

أَمَّا بَعْدُ،

فِيَا عِبَادَ اللَّهِ، اتَّقُوا اللَّهَ وَأَوْصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

Marilah kita bersama-sama bertakwa kepada Allah Subhanahu wa Taala dengan sebenar-benar takwa, iaitu dengan melaksanakan segala perintah dan seruan-Nya serta meninggalkan segala larangan-Nya kerana dengan takwa sahajalah kita akan mendapat reda Allah Subhanahu wa Taala di dunia dan akhirat.

Sidang Jumaat yang dirahmati Allah Subhanahu wa-Taala

Sempena dengan Ramadan tahun ini, marilah kita mempertingkatkan amal ibadah dengan melaksanakan segala perintah dan suruhan Allah Subhanahu wa-Ta'ala. Sama ada yang wajib dan juga yang sunat. Antara perintah Allah Subhanahu wa-Ta'ala yang wajib kita laksanakan adalah ibadah zakat iaitu zakat harta dan zakat fitrah. Bagi setiap orang Islam yang telah mencukupi syarat kewajipan berzakat



hendaklah mengeluarkan zakat tanpa melengah-lengahkan dan mencuaikannya. Kewajipan menunaikan zakat ini adalah seperti kewajipan melaksanakan ibadah solat juga iaitu dituntut untuk menunaikannya di awal waktu iaitu apabila cukup haulnya selama 1 tahun hijriah. Malah tuntutan telah diulangi sebanyak 32 kali dalam al Quran dan sering digandingkan dengan tuntutan ibadah solat. Firman Allah Subhanahu wa-Ta'ala dalam surah al Baiyyinah ayat 5 :

أَعُوذُ بِاللَّهِ مِنَ الشَّيْطَانِ الرَّجِيمِ
وَمَا أُمْرُوا إِلَّا لِيَعْبُدُوا اللَّهَ مُخْلِصِينَ لَهُ الدِّينَ حُنَفَاءَ وَيُقِيمُوا الصَّلَاةَ وَيُؤْتُوا الزَّكَاةَ وَذَلِكَ
دِينُ الْقَيِّمَةِ ﴿٥﴾

Yang Bermaksud: *“Pada hal mereka tidak diperintahkan melainkan supaya menyembah Allah dengan mengikhlaskan ibadat kepada-Nya, lagi tetap teguh di atas tauhid; dan supaya mereka mendirikan solat serta menunaikan zakat. Dan yang demikian itulah cara hidup yang benar.”*

Sidang Jumaat yang dirahmati Allah Subhanahu wa-Ta'ala

Zakat yang kita tunaikan melalui Pusat Kutipan Zakat Majlis Ugama Islam dan Adat Resam Melayu Pahang telah memberi manfaat kepada pembangunan syiar Islam dan kebajikan umat Islam yang tergolong dalam kalangan asnaf zakat. Pada tahun 2023 Majlis Ugama Islam dan Adat Resam Melayu Pahang telah mengagihkan zakat sebanyak RM 219 juta kepada 129 ribu orang penerima. Ini termasuklah bantuan untuk golongan fakir dan miskin sebanyak RM 95 juta kepada 70 ribu orang penerima.

Jumlah selebihnya diberi kepada asnaf fisabilillah seperti pelajar, bayaran elaun pegawai masjid dan bantuan Ihya Ramadan. Malah banyak lagi agihan zakat yang telah dilaksanakan oleh Majlis Ugama Islam Pahang bagi tujuan menyantuni asnaf zakat yang lain. Oleh itu, semakin banyak zakat dapat dikutip maka semakin



ramailah golongan asnaf yang akan mendapat manfaatnya. Firman Allah Subhanahu wa-Ta'ala dalam surah at Taubah ayat 60:

إِنَّمَا الصَّدَقَتُ لِلْفُقَرَاءِ وَالْمَسْكِينِ وَالْعَمِلِينَ عَلَيْهَا وَالْمُؤَلَّفَةِ قُلُوبُهُمْ وَفِي الرِّقَابِ
وَالْغَرَمِينَ وَفِي سَبِيلِ اللَّهِ وَأَبْنِ السَّبِيلِ فَرِيضَةً مِّنَ اللَّهِ وَاللَّهُ عَلِيمٌ حَكِيمٌ ﴿٦٠﴾

Yang Bermaksud : “*Sesungguhnya sedakah (zakat) itu hanyalah untuk orang fakir, dan orang miskin, amil yang menguruskannya, dan muallaf yang dijinakkan hatinya, dan untuk hamba yang hendak memerdekakan dirinya, dan untuk (membebaskan) orang yang berhutang, dan untuk dibelanjakan pada jalan Allah, dan untuk orang musafir yang keputusan dalam perjalanan, (Ketetapan hukum yang demikian itu ialah) sebagai satu ketetapan (yang datangnya) dari Allah dan (ingatlah) Allah Maha Mengetahui lagi Maha Bijaksana.*”

Sidang Jumaat yang dirahmati Allah Subhanahu wa-Ta'ala

Menunaikan zakat merupakan tanda kesempurnaan iman dan Islam, manakala keengganan untuk mengeluarkan zakat adalah berdosa besar. Bahkan Saidina Abu Bakar r.a menghantar bala tentera untuk memerangi golongan yang menolak kewajipan berzakat. Sabda Rasulullah Sallallahu Alaihi Wasallam dalam hadis yang diriwayatkan oleh Imam al-Bukhari dan Muslim :

فَاعْلَمَهُمْ أَنَّ اللَّهَ افْتَرَضَ عَلَيْهِمْ صَدَقَةً فِي أَمْوَالِهِمْ تُؤْخَذُ مِنْ أَعْيَانِهِمْ وَتُرَدُّ عَلَى

فُقَرَائِهِمْ

Yang bermaksud: “*Maka khabarkanlah kepada mereka sesungguhnya Allah Subhanahu wa-Ta'ala telah mewajibkan zakat ke atas harta-harta mereka, di ambil*



dari kalangan mereka yang kaya dan diberikan kepada golongan fakir dalam kalangan mereka.”

Oleh itu, janganlah kita memandang remeh akan kewajipan berzakat ini dengan melengah-lengahkan pembayarannya atau berasa rugi menunaikannya. Ini semua adalah bisikan syaitan dan tanda kelemahan iman. Allah Subhanahu wa-Ta’ala telah memperingatkan dengan siksaan yang amat pedih di akhirat. Firman Allah Subhanahu wa-Ta’ala dalam surah at-Taubah ayat 35:

يَوْمَ يُحْمَىٰ عَلَيْهَا فِي نَارِ جَهَنَّمَ فَتُكْوَىٰ بِهَا جِبَاهُهُمْ وَجُنُوبُهُمْ وَظُهُورُهُمْ هَذَا مَا كُنْتُمْ

لِأَنْفُسِكُمْ فَذُوقُوا مَا كُنْتُمْ تَكْنِزُونَ ﴿٣٥﴾

Yang bermaksud: *“(Iaitu) pada hari dibakar emas perak (dan harta benda) itu dalam neraka jahanam, lalu diselar dengannya dahi mereka, dan rusuk mereka, serta belakang mereka (sambil dikatakan kepada mereka): "Inilah apa yang telah kamu simpan untuk diri kamu sendiri, oleh itu rasalah (azab dari) apa yang kamu simpan itu.”*

Sidang Jumaat yang dirahmati Allah Subhanahu wa-Ta’ala

Marilah kita menunaikan zakat harta yang kita miliki sama ada emas dan perak, wang simpanan, padi dan binatang ternakan serta tunaikanlah juga zakat pendapatan dan zakat fitrah kepada Pusat Kutipan Zakat Majlis Ugama Islam dan Adat Resam Melayu Pahang.

Sebagai sebuah institusi yang diamanahkan oleh Kebawah Duli Yang Maha Mulia Sultan Pahang untuk menguruskan zakat, maka ayuhlah kita bersama-sama memberi sokongan moral dan material agar dapat menjalankan fungsinya dengan sebaik mungkin. Semoga harta yang kita miliki akan menjadi bersih daripada



sebarang hak orang lain dan mendapat keberkatan serta membersihkan hati daripada sifat bakhil dan kedekut. Firman Allah Subhanahu wa-Ta'ala dalam surah at Taubah ayat 103:

أَعُوذُ بِاللَّهِ مِنَ الشَّيْطَانِ الرَّجِيمِ
خُذْ مِنْ أَمْوَالِهِمْ صَدَقَةً تُطَهِّرُهُمْ وَتُزَكِّيهِمْ بِهَا وَصَلِّ عَلَيْهِمْ إِنَّ صَلَاتَكَ
سَكَنٌ لَهُمْ وَاللَّهُ سَمِيعٌ عَلِيمٌ ﴿١٠٣﴾

بَارِكْ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ
وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ. أَقُولُ
قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ
وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.